

外傳

沔陽志十八

陳友諒沔陽人本姓謝祖千一贅于陳遂從其
姓父普才黃蓬漁子也友諒幼岐嶷比長膂力
過人優於武藝嘗為縣吏不樂會羅田徐壽輝
與倪文俊兵起慨然往從之為文俊簿書掾尋
亦領兵為元帥及文俊專恣心不能平元至正
丁酉九月文俊謀殺壽輝不果奔黃州友諒因
乘釁襲殺之遂并其軍自稱平章戊戌友諒攻
安慶守臣余闕固守倚小孤為藩蔽命義兵元

志十八

外傳

一

帥胡伯顏統水軍戍守友諒自上流直擣山下
伯顏與戰四日夜不勝奔還友諒進薄城下闕
遣兵扼之俄而饒兵攻西門友諒兵乘東門既
登城闕簡死士奮擊敗之友諒恚甚乃并軍樹
柵起飛樓來攻闕分兵捍敵晝夜不得息友諒
兵四面蟻集城陷闕死之夏四月破龍興路復
破瑞州五月友諒遣康泰趙琮鄧克明等攻邵
武又遣別將攻吉安路進破撫州八月破建昌
路九月破贛州十一月破汀州己亥三月遣兵

略衢州復遣兵破襄陽路六月復遣其黨王奉國攻信州元江東廉訪使伯顏不花的斤自衢往援破走其兵後數日又攻之復大破之友諒弟友德植木柵攻城益急又遣使來說降的斤數其罪而斬之王奉國遂穴地梯城晝夜攻之踰旬城陷的斤死之十二月陷杉關初徐壽輝聞友諒破龍興欲徙都之友諒忌其來不利己不從至是壽輝固引兵發漢陽南下江州友諒陽出迎而伏兵於城西壽輝既入門閉伏發盡

志十八

外傳

二

殺其部屬惟存壽輝以江州為都居之遂自稱漢王立王府置官屬事權一歸友諒壽輝擁虛位而已庚子四月友諒以壽輝自樅陽攻池州張德勝率我師往援至則守將趙忠被執城已陷矣乃設伏敗之斬首萬級生擒三千餘遂復池州五月漢王友諒以重兵犯太平城陷殺其守將花雲遂直犯龍江太祖大怒命諸大將共謀擊之于石灰山殺傷相當馮勝率敢死士直衝其中堅大破之友諒

僅以身免追至采石復與大戰友諒復敗而遁
遂復太平初友諒犯太平挾壽輝以行及太平
陷急謀僭竊乃於采石舟中佯使人詣壽輝前
白事令壯士持鉄鎚自後擊之碎其首壽輝死
友諒遂以采石五通廟為行殿稱皇帝國號漢
改元大義仍以鄒普勝為太師張必先為丞相
群下立江岸草次行禮值大雨至畧無儀節既
而復還江州遣人約張士誠侵建康

太祖以康茂才與友諒舊召使畫策茂才曰吾

志十八

外傳

三

家有老闍舊嘗事諒令賫書偽降約為內應必
信無疑友諒得書果大喜問曰康公安在曰見
守江東橋又曰橋何如曰木橋也乃遣使還謂
曰歸語康公吾即至至則呼老康為號歸具以
告乃命李善長易江東橋以鐵石通宵治之友
諒至見非木橋乃驚疑連呼老康無應之者始
知闍者謬已茂才乃合諸將奮擊大破之降其
將張志雄梁鉉喻國興劉世衍等縛其士卒二
萬友諒奔還尋遣其將張定邊陷安慶府

太祖乃令諸將曰友諒賊殺其主僭稱大號侵我太平犯我建康今又以兵陷我安慶觀其所為不滅不已爾等其厲士卒以從徐達進曰師直為壯今我直而彼曲焉有不克獻計者或謀以城降或以鍾山有王氣欲奔據之或欲決死一戰而走未晚也劉基獨張目不言太祖乃召基入內基曰先斬主降議及奔鍾山者乃可破賊耳

太祖曰先生計將安出基曰如臣之計莫若傾

志十八

外傳

四

府庫開至誠以固士心且天道後舉者勝宜伏兵伺隙擊之取威制敵以成王業在此時也太祖遂用基策督諸帥率舟師乘風遡流而上遂克安慶長驅向江州距其都五里許友諒始知之謂神兵自天而降大破之友諒挈妻子夜奔武昌我師遂入九江獲馬二千足糧十餘萬石既而友鯨相胡廷瑞見江州已破遣便詣軍中請降平章祝宗亦以南昌降壬寅春正月太祖命宗從徐達征武昌宗中道叛回據南昌

四月始定其亂

太祖曰得南昌是去陳氏一臂因命大都督朱文正統元帥趙德勝等往鎮其地時友諒據湖廣張士誠據浙西皆未下衆以為蘇湖地肥饒欲先取之基曰士誠自守虜耳友諒居上流且名號不正宜先伐之陳氏既滅取張氏如囊中物耳

太祖曰友諒剽而輕其志驕士誠狡而懦其器小志驕則好生事器小則無遠圖若先攻士誠

志十八

外傳

五

友諒必空國而來是我疲於應敵事有難為先攻友諒士誠必不能踰姑蘇一步以為之援朕所以取二寇者固自有先後也會友諒忿其疆場日蹙乃作大艦來攻洪都自為必勝之計載其家屬百官空國而來以兵圍城其氣甚盛號六十萬兵戴竹盾禦矢石用雲梯等攻具百道攻城文正城上發砲石擂木火箭無不破之敵晝夜環攻友諒親督促之意必拔文正主畫軍中分布諸將隨方應敵剪獲甚衆友諒復以所

獲吉安守將劉齊朱華臨江同知趙天佑狗城
下文正畧不為動已而德勝中流矢死被圍日
久音問不通文正遣千戶張子明告急於建康
敵攻城益急文正遣捨命王詣友諒營詐約日
出降友諒信之緩其攻及期城上旗幟一新至
暮不出友諒乃縛捨命王於城下殺之文正堅
守以待援至初子明取東湖小漁舟夜從水關
潛出越石頭口夜行晝止半月始達建康見
太祖具言其故

志十八

外傳

六

上問友諒兵勢何如子明對曰友諒兵雖盛戰
鬪死者亦不少今江水日涸賊之巨艦將不利
用又師久乏糧若援兵至必可破也

太祖曰歸語文正但堅守一月吾當自取之子
明還至湖口為友諒所執友諒使呼文正出降
子明至城下呼曰大軍且至固守以待文正聞
之守益堅敵莫能破七月丙戌

太祖親帥諸將發舟師二十萬進次湖口自友
諒圍洪都至是凡八十有五日聞援兵至即解

圍東出鄱陽湖以逆我師丁亥遇于康郎山戊子我師分為十二屯徐達常遇春等諸將擊敗其前軍俞通海復乘風發火炮焚寇舟二十餘艘軍威大振友諒驍將張定邊奮前欲戰常遇春射却之廖永忠即以飛舸追定邊定邊走身被百餘矢士卒多死傷己丑諸軍接戰至晡東北風起復以七舟載葦荻置火藥其中乘風縱火焚其水寨舟數百艘火熾十里之間烟焰漲天湖水盡赤友諒弟友仁友貴及平章陳普略

志十八

外傳

七

等皆焚死溺萬餘人賊鋒盡挫庚寅永忠通海等以六舟深入鏖戰敵聯大艦擁蔽悉撚刀以死拒我師望六舟無所見意已陷沒有頃六舟飄飄而出勢若游龍我師見之勇氣愈倍合戰益力呼聲動天地敵兵大敗友諒奪氣辛卯張定邊欲挾之退保鞋山為我師所扼不得出斂舟自守不敢戰是夕我師渡淺泊于左蠡與友諒相持者三日八月八日我舟入江駐南湖嘴水陸結營劉基期以金木相犯日決勝負敵舟

不敢出糧且盡壬戌友諒計窮冒死突出欲由
禁江口奔還武昌

太祖麾諸將邀擊之舟聯比隨流而下自辰至
酉力戰不已友諒是日中流矢貫睛及顱而死
擒其太子善兒諒自稱帝至死僅四年年四十
四其平章陳榮姚天祥已下悉以樓船軍馬五
萬來降定邊乘夜以小舟載友諒屍及其子理
徑趨武昌復立理為帝改元德壽我師復圍之
甲辰春正月

志十八

外傳

八

太祖建國號吳二月以武昌圍久不下乃親往
視師督諸將擊之擒其元帥張必先既而遣羅
復仁入城諭陳理使降遂率其太尉張定邊詣
軍門降凡府庫悉令理自取城中民多饑困命
給粟振之於是湖廣江西諸郡相繼皆降乃封
友諒父普才承恩侯理順德侯友諒兄友富歸
仁伯友直懷恩伯弟友仁追封康山王命有司
塑像歲祀焉後普才徙滁理徙高麗

平江漢頌

天眷有德實惟

哲皇肆其神畧以靖寇攘義旄東指罔敢弗恭
風烈虎嘯雲游龍驤長淮既歸江左攸屬浙之
東西樹侯置牧乃建國家以奠南服以懷中原
以控西蜀蠢尔小醜敢讐大邦集其克頑鋒蝟
斧蟾輕涉我疆以跳以踉亦既剪劉僵骸覆江
游齊六軍直傾其穴釋而勿誅俾自懲刷闔胡
不然復豕而啣翹其蟲臂當吾車轍

志十八

外傳

九

皇用震怒歷告在廷是決不悛命將徃征爾選
舟師爾整甲兵漕爾糗糧各罄爾誠搖光在申
夷則之月馮牙江濱

皇秉巨鉞以誓以戒以速其發紀律精明颯火
奮激旃旒揚揚舲艘將將矛戈洸洸鎧胄明明
載怒載厲載飛載颺雄威所吞已無荆湘既與
虜逢大呼衝擊藥騰藜駁星流火戟虐燄雷奔
巨轟雷劈殺氣冥蒙不辨咫尺矢鋒所貫什伍
聯聯縱橫交紐命隕弗顛攢桅湊颿筍東蝟編

流尸塞川舟行弗前虜魄既攄扶創而逸聚于
湖奧僅存喘息我方植柵江之南北火筏在流
掩蔽如翼越歷四旬飛走途窮將冒萬死以絕
其衝我師見之千艚如龍似兔之走而鷹之從
酣戰六時由辰達酉僕姑一發殪此酋首貫睛
及顛仆若枯柳大憝既除餘不能醜遁相告言
我誠不振我革我頑我歸至仁誰謂培塿可高
嶙峋再拜稽首來降來臣

皇曰俞哉汝俘予受宥汝弗劉予汝父母汝凍

志十八

外傳

十

予衣汝饑予哺昔何昏迷今始撤葍奏凱而旋
騎吹鬱搖形於樂歌節以鐺饒飲至于廟頒賞
于朝帛堆其家肉登其庖都人聚觀舉手加額
或歎或謠有聲嘖嘖干戈相尋匪一朝夕自今
升平可坐而莢惟

皇神武動則克之群策盡屈四方式之惟

皇寬慈降則釋之義聲動盪疇能敵之惟

皇明斷遇事即決洞見千里不隔一髮所以西
征成此駿烈小大畢朝孰敢肆孽在昔赤壁泊

乎合淝事以幸集尚傳策書况茲之功俊偉赫
熹揆古無讓可無咏詩臣雖微賤文字是職對
揚

皇休并獻臣臆三代以還用仁興國

皇宜遵行永作民極

史氏曰胡元亂華天地晦塞譬諸禽獸人得而
驅之也友諒奮臂蓬湖提戈荆楚遂能屢破堅
城卒僭尊位可謂勇矣然既戕主師復弑天完
凶戾罕儔殘虐無厭人謂項籍矯殺冠軍陰弑
志十八

外傳

十一

義帝大抵同矣及

天命有歸

真人首出諒不能委身江漢輸款闕廷而乃犯
我龍江闕我洪都盛兵東下志意驕悍此何異
滎陽之圍也卒之授首鄱陽鯨鯢盡殪何暇烏
江之刎乎驅爵於林驅魚於淵盖聖王之鷗獺
爾余因據國史書之又明玉珍或云沔人史云
隨人故不書

贊曰嗟爾漁豎黷禍構亂雲擾荆楚鼎沸江漢

蠅聲紫色終厪

皇筭

志十八

外傳

十二

外傳

辯誤

故志官秩有沔州守高稼景陵知縣裴讓叙按宋史稼知沔州蒙古入寇稼死之時賊自鳳州入沔無城依山為城不類沔陽地且是時沔陽縣廢久止稱復州則知稼所守迺漢中之沔州也景陵乃唐憲宗陵名在奉天縣賊損神門戟架事涉山陵故宣宗以讓知縣事讓所知乃奉天非景陵也且是時景陵尚名竟陵至五代晉始改今名其失實類如此

志終

後序

一

又宋安撫翟貴以城降元而故志有翟黃與貴同時同官考之諸書無翟黃名疑即貴也若是則非宋之忠臣不足紀錄故并存以俟考其諸故蹟訛舛者已附註其下後之君子或不以為謬也承叙識